



10 de setembro de 2010. A consellería de Medio Rural permitirá batidas de xabarín dende abril até xaneiro para "combater" os perxuizos desta especie. **Dez**

meses de caza ao ano

e máis de 20.000 batidas autorizadas de antemán que non precisarán acreditar danos. Nisto consiste a

“caza preventiva”

, un vello anxeio dos cazadores máis cavernícolas que agora Conservación da Natureza vén de asumir. Tal proposta, inédita en calquera política ambiental seria, vai expulsar ou poñer en grave risco a integridade de todas as persoas que non sendo cazadores, frecuentamos o monte. Tamén causará graves

danos a outras especies

de fauna salvaxe, incluídas especies protexidas, que non terán o sosego necesario para se reproducir, ou cuxas crías serán devoradas polas xaurías dos cazadores. Con medidas coma esta, os responsábeis de Conservación da Natureza certifican unha vez máis a súa

incompetencia

para xestionar a biodiversidade galega: son o raposo a ter conta do galiñeiro!

A xustificación para o alongamento da actividade cinexética pretende, segundo a administración, rematar cos danos á agricultura, cando este sistema xa se amosou inútil para tal fin: cada ano autorízanse mais batidas e cada ano hai máis denuncias por danos, mesmo baixo a sospeita de seren feitas polos propios "cazadores-recolectores", co obxecto de acadar autorizacións “extra” para realizar batidas á marxe da tempada oficial.

Con decisións coma esta, que abeira a inconstitucionalidade, a administración ambiental galega só pretende favorecer ao lobby da caza e aos seus negocios paralelos (venta de armas e complementos cinexéticos, por exemplo), en detrimento do resto da cidadanía que ten dereito a frecuentar o monte e da propia conservación dos recursos.

Os danos ocasionados polos animais salvaxes, nomeadamente o xabarín, relaciónase coa desaparición das especies cinexéticas clásicas (como coellos, perdices, lebres, etc.), co exterminio dos depredadores naturais (principalmente o lobo) pero sobre todo co abandono do rural. Por iso, cómpre primeiro poñer o monte en valor, diversificando os usos (os monocultivos de eucalipto e do millo teñen moito que ver coa proliferación do xabarín) e coidándoo racionalmente, limpando o exceso de mato durante o inverno o que tamén rebaixaría o risco de lumes. Sen actuar sobre estes factores, meter máis pólvora e máis chumbo no monte non

solucionará o problema e afondará no desequilibrio ecolóxico destas áreas.

Por iso, esiximos que se destinen recursos a limpar os montes durante o inverno, fomentando a repoboación con frondosas, factores limitantes do mato, e obrigando aos Tecores a realizar plantacións disuasorias lonxe das zonas agrarias, alén de incentivar o valado das explotacións, entre outras medidas.

Facer o xogo ao lobby da caza concedendo máis batidas non solucionará o problema, ao igual que destinar inxentes cantidades de cartos á extinción non diminuíu o número de lumes. Con medidas coma esta, os responsábeis de Conservación da Natureza certifican unha vez máis a súa incompetencia para xestionar a biodiversidade galega: son o raposo a ter conta do galiñeiro!

Descarrega o comunicado íntegro, subscrito polas 7 principais organizacións ecoloxistas galegas (ADEGA, Amigos da Terra, Libera, Coto do Frade, Federación Ecoloxista Galega, Matar por matar NON e Verdegaia) na seguinte [LIGAZÓN](#)